



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



Tir Yimiyim



tir\_yimiyim



tir yimiyim

TAPAK 7

**Brazil centre-back Eder Militao  
World Cup masayatetsü**

**Mali Defence Minister Sadio  
Camara tepsetogo**



VOL. XXIII ISSUE NO. 193 (ADOK 193) DIMAPUR TENTONÜ (MONDAY) RONGCHII (APRIL) 27, 2026

₹ 5.00

## India-Nepal arrtsü inyakyim melenshir

**New Delhi, April 26, 2026 (Agencies):** India-Nepal arrtsülen maparen melenshir aser linük anaprongi cross-border inyakyim tasen lateter.

Nepal-i customs rule tasen ka tenzükogo aser iba ajanga jenjang dalang agi aliba asoshi tax agir aser külen India-ia facial recognition ajanga entry aser exit record süa ayutsü indang inyakyim ka renemer.

Nepal Prime Minister Balen Shah-i tawa tu customs asoshi lemtet ka agiogo aser iba ajanga arrtsü nung goods mita repranger. Nepal Police aser Armed Police Force (APF) ajanga Nepalese rupees 100 ser tema goods nung customs duty agir aser iba ya India sen Rs 62 shi lir.

Iba ajanga arrtsülen teti bener

senzükba goods akangakanga mita anüktüsü tenzükogo. Nepal-i 659-page list ka sayaogo aser iba nung food products aser tanga common goods dena items aika nung duty charges lateta lir.

India sorkaria arrtsülen senzürtem asoshi Facial Recognition System (FRS) ka tenzükogo. Iba ajanga India aser Nepal tsingda gari lenmang ajanga senzürtem record asütsü aser pamok travel data bendena ayutsü.

Uttar Pradesh kübok Maharajanj district nung aliba Sonauli border nung pilot project tenzükogo.

Inyakyim ajanga arrtsü nung Nepal aser India tsingda senzürtem noksa tangoktsü aser iba ya amshia nisung shia indang travel history renemtsü.

## Sorkari kin o kin bendanga amshir: Kuki CSOs

**Imphal, April 26, 2026 (Agencies):** Ukhrul nung Kuki Civil Society Organisation (CSO) Working Committee-i Manipur sorkar aser Centre aitsüogo.

Manipur nung kin o kin tsingda mepetmesü nung sorkartemi bendanga amshir aser April 24 nü Mulam yimtsüng amakterem tayimtsü ajanga anir ao ta CSO Working Committee-i ashi.

Kuki nunger anema inyaksangshir aser talisa iba ya Ukhrul district nung inyaker. State sorkari ozüng kübok nisung ajak kasa kümzüka mayor ta parnokishi ashi.

Mulam tatalokba nung Ramshang Kamodang aser Shonshok Mahung nati civilian tem amakba aser kiojen rongdoktsüba atema jangjaogo. Tena aputsü melena medical treatment atema tayimtsü ajanga anir ao aser iba ajanga state sorkar infrastructure amshiba sayur ta Committee-isa metetdaksü.

"Aibelener nem iba ama teyari agütsüba aser külen takoksa ajururtem maneni timtemdaksüba ajanga sorkar reju shinga tsütsü mashitsüba nung tasüngdangbatem adoker. Iba tesem nung kulitem anguba ajanga kanga mejungi inyakba sayur" ta parnokisa ashi.

Kodangsa mepetmesü adokdir Kuki nunger alidak aerial monitoring asür aser civilian tem kümzüka ayutsü maparen shitak meinyaker ta Committee-isa metetdaksü.

April 24 nü Mulam yimtsüng nung lendong atalokdang civilian ana tepset aser 9 yirutsü. Teyirurtem rongnung tetsür aser tanurtem densema lir. Iba tatalokba nung ki 16 rongdoktsü ta parnokisa ashi.

Manipur nung mapang

talangka tensa mesüngjemteti arur aser Kuki nunger anema inyaksangshir manener, senzüka yutsür aser osang tim mesüi prokshir. State sorkari kintem bendanga amshiba ajanga temulung melemtep tuluba kümogo aser nübortem dak kongshioigo ta committee-isa ashi.

"Kuki nungeri tayongzükbatem ajuruaka onok taküm, ali aser akhüm kümzüka ayutsü" ta Kuki CSO Working Committee-isa metetdaksüogo.

Külen, Kuki Women Organisation for Human Rights-ia Ukhrul district nung village volunteers ana tepsetba sülen temeten meshioigo.

Parnokisa Centre sorkar dang Manipur nung security tensa kanga mejungi akümba asoshi mapa inyaksü ayongzükgogo.

Manipur nung kin o kin tsingda mepetmesü adoker May 3, 2026 nü küm asem abensatsü saka tensa kecha balaka memelenshi lir. Aiben nangzükkaka tensa kasa dang aser nisungtem maneni amaker aser civilian tem pei talidak toktsür aotsüsa lendong ataloker ta Kuki Women Organisation for Human Rights-ia ashi.

Ukhrul district kübok Mullam aser Songphal nungi Kuki village volunteers ana tepset. Iba ya Tangkhul telungpurtemi automatic weapons amshia amakba liasü ta parnokisa ashi.

"State sorkar nungi tenangzükbatem dang masü saka mapa inyaksü akhanger. Kuki nunger taküm, kiojen aser temetentem kümzüka ayutsüla. Maneni Centre sorkari mapa inyaksü mepishir aser nisung tepsetba o kiojen raksatsüba atema Tangkhul o Meitei telungpurtem anema okadak ken o tem benoka angadangtsüla" ta parnokisa metetdaksüogo.

## White House Correspondents' Association Dinner amak



April 25, 2026 nü Washington, D.C. nung White House Correspondents' Association dinner alidang injang khatokba ola angashiba sülen United States Secret Service personnel temi sabang nung President Donald Trump, First Lady Melania Trump aser tangartem meketbangba angur.

**New Delhi, April 26, 2026 (Agencies):** Nisung kati White House Correspondents' Association Dinner indang ballroom telungi aitsü merang aser pai Trump administration züngsemtem dak tenük yoka iba ya inyak ta Acting US Attorney General Todd Blanche-i Deobarnü metetdaksü.

Honibar aonung White House correspondents' dinner nung injang aika khatok saka iba tatalokba nung US President Donald Trump meyiru aser aniena liasü ta pai ashi.

Iba tatalokba sülen US President Trump-i osangbener den jembidang pa, First Lady Melania Trump, Vice President JD Vance aser tanga cabinet züngsemtem ajak lendong nungi jenbua lir ta ashi.

Iba sentong nung Defense Secretary Pete Hegseth aser Secretary of State Marco Rubio napronng liasü aser tenapronng lendong kecha melii anienogo ta Trump-isa ashi.

Trump aser tejaokertem

menaliba ballroom kima nung iba lendong ya atalok ta ketdangsurtemi ashi.

Osang kar ajanga injang khaloktsüsang kshasetogo ta ashir saka US Secret Service-i temulung melemba nisung pua lir aser iba pa taküm lir ta jangjatsüogo.

White House nung osangbener den jembidang US president Trump-i iba temulung melemba nisung ya California nungi aser pa ket nung hadir aika bena liasü ta ashi.

Iba nisung ya Cole Tomas Allen ta jangjaogo. Pa ya registered Democrat ka lir aser Kamala Harris indang 2024 presidential campaign nung tenla agüja liasü ta activist Laura Loomer-i metetdaksüogo.

Washington nung White House Correspondents' Association dinner alidang President Donald Trump aser par ketdangsurtem dak tenük yoka amak ta US Acting Attorney General Todd Blanche-i Deobarnü ashi.

Iba nisung ket nung prangpong aser hadir aika bena liasü aser pai Washington Hilton hotel nung Secret Service agent ka dak injang khaloktsü saka pa apu.

Iba mapang Donald Trump aser First Lady Melania Trump na den Vice President JD Vance aser ketdangsurtem ballroom nungi anien.

"Bushisingdanga arudang iba nisung yagi US President aser ketdangsurtem dak tenük yoka amak. Administration nung inyakertem dak pai tenok yok aser iba nung president dena lir" ta Todd Blanche-i ashi.

Iba nisung ya US West Coast nungi Washington-i aru aser White House Correspondents' Association dinner aliba hotel nung anenzüka liasü ta ketdangsurtemi ashi.

Iba lendong nung Secret Service agent ka dak injang khaloktsü saka bullet-resistant vest ajanga pa kümzüka ketdangsurtemi saka metetdaksüogo.

## May 1 nü Chuchuyimlang nung Moatsü benjong tulu ka ayonger

**Chuchuyimlang yim, 25th April (TYO):** Aor Moatsü benjong meraketa amungba indang jembidang aiben asen mulungjangi arubaji Chuchuyimlang nung Moatsü amungba indang ya jet ta arur, kechiyong par yimdam Moatsü amungba yabo tangar dang nungi kheni balaka metsünga reta amunger.

Ao lima ajaklen nung Moatsü amunger saka ozü

yimdam alakteta amungba kaji talisa onoki kishikina Aor dang masü saka tanga kin shirnok den ancha sobaliba bentshia arur, item yimtem jaoka longsotepa mungteper. Iba ajanga onok tsüngta telungjem tali adokba den temeim akangshia sentakteper. Inyakyim balakaji ngua Nagaland sarkari 2000 küm to Chuchuyimlang yim ya "Moatsü Destination" nungja agütsü.

Aji oda, tanga mapang nung amato maneni taküm küma May 1, 2026 nüji Chuchuyimlang Tourism Committee ajanga Moatsü benjong sentong tulu ka Anü Mai Amphitheater nung ayongzüka lir, ta tanü Chuchuyimlang Village Council Chairman, Ao Sanen Pongen-i osangbener senden ka nung metetdaksü.

(Maneni tapak 2 nung...)

# Küm 700 sülen Longsa yimküüm lungzüng azüngogo



**Alemtemshi Jamiri Longsa Lungzung Lapoktsur kulan Longsa yimsurtem den tangokba noksa nung angur.**

**Longsa yim, 25th April (TYO):** Taoba Nagaland Chief Secretary, Alemtemshi jamir, IAS (Retd)-i 25th April, 2026 nü Longsa yimdak Imrongtaw nung Longsa yimküüm lungzüng ka meraketa lapoktsüogo. Longsa Baptist Arogo Pastor, Rev. Spongchiten-i iba lungzüng meshitettsü.

Meimchir asoshi süiren (history) ya kanga tongtibang, pei tera memetetba nisungjibo shingai mezüngshir, anungji, yimküüm otsüji tongtibang aser ibai lanu putu asoshi wazüka ayutsü apitetba asoshi achayangertem dang lungzüng lapoktsür-i pelaba metetdaksü.

Lungzüng azüngba ya yim ka kodang aküm ta züluba kisüngji masü saka yim kümer küm noklang tenet dak tali mera arudang koma liasü ta lepa oa bilemdangtsü tim, aser aji asenok asoshi kanga tongtibang lir, ta pai ashi. Yim ka küm noklang paikaji liteta arubaji tesümgangtsüka lir, anungji, Tsüngremi asenok koda moatsü ibaji asenoki mamatoktsüla, ta paisa shisem.

Putu tasanba ya arur küm noklang ka shi dang, aji oda, küm noklang trok dak tali asen

otsüla oboula nungeri mapa meranga inyaker pei tepok sünga aliba den kika süchi mapa balala inyaker aser arsüi oa konang nüngsang bushi aser ibaji par mapang mapa temela masü asü. Asen tsüraburtemi konang bushiba maparentemji meraketa inyaker, anungji, lanu putui par mapa tajungtemji mamatoktsü paisa nenshi.

Akhi tsürabur taküm indang jembidang pai, tanü putu nung gari amala nungdakba (facilities) mali saka aluyimba ajanga parnok taküm lia yim balala sema jaja aser akümket aser tetushi wazüka ayu. Iba lungzüng ya tetsü-tebou taremsük aser senmang aliba bilemtetdaksütsü den tanü tashi yim küküm-küküma liyonga aruba tamaittsü sayur ta ashi.

Paisa, British nunger mapang nungi tenzüka state akümba sülena Longsa yimtsüng nungi küm aika nübur tenzüka (public service) nung shilem agia aruogo aser nisung aikadi state administration mapa nunga shilem agiogo aser tanü tashi agidar, ta ashi. Tanü lanu putu danga maneni nübur tenzüka wadang nung khuret bena shilem tajung agitsü aser

pei tera mamadoktsü asoshi paisa ajungshi.

Sobaliba wazüka yutsü atema olen ka shisemdang, talisa bendanglen alir chirnurtemi pei tetsü oshi sapua mejembir, anungji, tsüraburtemi pei chirnurtem dang pei tetsü oshi sayuba den tim sobaliba sayutsü merangtsü pai ajungshia liasü.

Longsa yim ya Rionsanger Puso AD 1258 nung akümba iba lungzüng nung keta lir. Yim kümer küm 768 shi arur. Longsa yim ya Pongener tebou Kongka, Sani, Longkumer (Meyur) tebou Rentsüba aser Jamir tebou Metsübo par lenisüba nung akümba aser Longsa yimküüm ken-tem iba lungzüng nung ajenloka angutsü.

Iba sentong nung Limaaküm Tatar, Bendangwati Tatar, Akangjungshi Tatar, Temjensosang Tatar, Alemwati Tatar aser Longsa Baptist Arogo Secretary, Tamsuyanger parnoki shilem balala agia liasü. Longsa chir Chubayimküüm, Meyilong, Moalenden aser jila balala nungi senso nübur aika adenshia iba sentong tali meraketdaksü.

# Assam Rifles-i state nung sentong balala ayongzük

**Dimapur, Rongchii/April 26 (TYO):** Assam Rifles temi World Veterinary Day nungtem nung April 26, 2026 nü Peren district kübok Tening nung Animal Care Awareness Programme ka ayongzüka shiruru meima aser anepalua amshitsü indang lemsatepa liasü.

Iba sentong nung Government Primary School, Tening nungi kaketshir 50 aser tesayur pongu aden.

Shiruru anepalua amshiba tajangzük aser parnoki takumsangnu aser parnok meketa aliba tesendaktep nung tongtipang shilem agiba indang lanurtem nem angatetdaksütsü nükjiding nung iba sentong ya ayongzüka liasü.

Iba mapang shiruru anepalua amshitsü, temeim sayutsü, chiyongtsü shidak agütsütsü, mapang shidak nung medical teyari agütsütsü aser anepalua amshitsü indang jembii.

Kaketshirtem dang Assam Rifles-i kidang metsüba shiruru aser yimtung nung aliba shiruru anepalua aser meima amshitsü

ajungshia liasü.

Iba sülen sensaksemba mapang agia shilem agirtemi shiruru anepaluba dak sendakba tebilembatem lemsatepa liasü.

Temeimtep adokdaksütsü, khuret abentsü aser civilian aser sepaitem tesendaktep tashi itshitsü asoshi maneni inyakba nung shilem ka ama Assam Rifles temi Care and Support Society Orphanage Home, Chungtia, Mokokchung nung Donation Drive ka ayongzüka liasü.

Iba sentong ya Philanthropy Box Initiative nung shilem ka liasü, aser iba kübok Assam Rifles-i Philanthropy Boxes ana amenoka lir.

Amshitetba aser nüngdakba oset tem bendena makamaiter, talisa orpnanage homes nung aliba tanurtem nem agütsütsü nükjiding nung iba inyakyim ya tenzü.

Iba sentong nung sepaitem aser kinunger temi pei sasa mulungsoa agütsüba nüngdakba osettem bendener orphanage nung tanurtem nem lema

agütsü.

Iba mapa tajung asoshi orphanage nung aliba ketdangsur temi Assam Rifles tem dang pelaba lemsatepa liasü.

Yangji aliba tanur temi Assam Rifles personnel tem den sensaksemba mapang pelaba lemsatepa liasü.

Maneni Assam Rifles-i April 25, 2026 nü Tuensang nung aliba Sumi Baptist Church nung tanurtem asoshi dental health camp ka ayongzük.

Meta talang nung alirtem nem healthcare tajungba agütsütsü aser nüburtem yaritsü asoshi inyakba nung shilem ka ama iba sentong ya ayongzük. Iba camp nung tanur 32 tashi dental care teyari agia liasü. Iba mapang dental consultations, restorations aser extractions densema teyari balala agütsü.

Assam Rifles temi parnok nem treatment agütsüba den külemi oral hygiene awareness indanga sayua liasü. Kasa mapang sentong nung adenertem nem parnoki toothbrushes tem lema agütsü.

# Nagaland Veterinary Field Assistants Association mungdang agiogo

**Dimapur, Rongchii/April 26 (TYO):** Nagaland Veterinary Field Assistants Association (NVFAA) pur inti mungdang April 24, 2026 nü Chümoukedima Town Hall nung munga liasü. Iba mungdang akhumtong Dr. Kuokehebi Gwirie, Director, Animal Husbandry and Veterinary Services liasü.

Dr. Gwirie-i iba sentong nung jembidang Nagaland nung aliba Veterinary Field Assistants (VFAs) tem inyaksangshi balala nungi kati ka ajungshitepa aser yaritepa inyakba atema tenüngsang agütsü.

Veterinary care ya kijai inyaktüba mapa ka masü saka veterinarians, VFAs, technicians aser staff tem lungjemer inyaktü mapa lir, ta pai ashi.

VFAs tem ya tongtipang frontline health workers tem lir aser nenoki animal health, environmental health aser nisung meimchir tsüngta apu latsür. VAFs ajunga qualified aser training agia lir aser 'professionally skilled' akumtsü

atema mapa nung maneni bendanga agütsür inyaktü nungdaker, ta pai ashi.

Veterinary mapa nungya timtem jenti aremzüksü nungdaker aser tensa balala nung mapa inyaktüsü akumer, anungji nenok mapa dangari memetetaka maneni nüburtem yaritsüla aser nenok mapa ajanga shiruru metsürtem ajangzüktsüla, ta Dr. Gwirie-i ashi.

Mission mode nung tang animal vaccination drives agiba indang süoka jembidang, inyaksangshi nung ajemdaker budget aser senotsü agütsür, koba Government of India-i bendanger, ta ashi.

Iba mungdang tembangba session nung retired JFM aser 2016 Governor's Commendation Awardee, Neizo Chale-i VAFs tem dang "Small Animal Restrainer" ama inyakdang ajangshiba kuli agüja liasü.

Kasa mungdang nung Nosazonu Puyo ya NVFAA indang tir ama tanaben shimshia liasü.

# May 1 nü Chuchuyimlang... (TAPAK 1 NUNGI...)



**Chuchuyimlang Village Council Chairman, Ao Sanen pongen Tatar den Chuchuyimlang Tourism Committee züngsem kar noksa nung angur.**

Taküm iba benjong nung Nagaland Deputy Chief Minister, Yanthungo Patton aser Advisor to Nagaland Chief Minister, Abu Metha na ka tongti tesemdanger aser ka tetushi tejaoker asütsü sentong renema lir.

Sentong nung Yaongyimsen aser Unger na den ano tanga kin nungi Pongching (Phom) aser Chakpa (Chang Meden) nungi yartsüngsang teloktem shilem agitsü jaoka lir. Iba aonung Moatsü concert ka alitsü aser iba sentong nung Dimapur Urban Council Chairman Federation (DUCCF) tir, Zasivikho Zakiesato special guest asütsü jaoka lir. Jangratemtsü osang tajung kaji – iba kenten sentong nung Nagaland nung nüngtugu kentener Keneisenuo Sorhie aser Momo Girl atenla Aseno Metha na den ano kentener tajungtemi shilem agitsü lir, ta metetdaksüogo.

Akhi nungi Chuchuyimlang-i ancha sobaliba benshia aruba yimtemji – Konyak kin nungi Changlangshu aser Okha yim, Phom kin nungi Yachem, Yaongyimchen, Orangkong, Pongu, Hukpang & Pongching yim, Chang kin nungi Yaongyimi old, Yaongyimi New, Chakpa,

Longra, Yangpi & Yali aser Sangtam kin nungi Chungliyimti yim lir. Item yim ajak iba benjong nung pei kin tata sobutsü sobur arua adentsü jaoka lir, ta tayongertemi metetdaksü.

2000 nung state sarkari Chuchuyimlang ya "Moatsü Destination" shim süra iba indang tajangzük kechisa mesüra iba nungtem nung terenlok mapa karbo inyaka lir na? ta metetnüa asüngdangdang, "tang tashibo Moatsü Destination tenüng nung sarkar nungi terenlok aruba mapa kecha maka, kümshii Chuchuyimlang nung Moatsü benjong amungba ya senso nüburtemi tenlaba ajanga lir", ta Council Chairman-i langzü. "Saka yasür teyari meshitsü tebilemba lir", ta paisa ashi.

Tongti tesemdanger jaokertem nungi terenlok mapa karbo meshitsü tebilemba ali asü? ta asüngdangdang, "yamaji kecha balaka tebilemba mali saka parnoki kar danga agütsüra lanlia", ta paisa menürema langzü.

May 1 nü koba Moatsü benjong amungtsü lir, iba nungji Aor, Naga nunger aser tejangrar alima penzürtem ajak pela shishia jaoker, ta parnokisa ayongzüka metetdaksü.



April 26, 2026 nü Srinagar nung Union Minister of Youth Affairs & Sports, Mansukh Mandaviya-i 'Sunday on Cycle' sentong nung shilem agiba noksa nung angur.

### PM Modi-i Digital Census 2027 nung shilem agitsü ayongzüker

New Delhi, Rongchii/April 26 (Agencies): Amongnü Ato kilonser, Narendra Modi-i, tang tagidak census ya sorkar mapatong ka dang masü saka ajak külem teinyaktsü mapa lir, anungji ajaki shilem agitsü nüngdak, ta metetdaksü. Ita shia agiba radio program 'Mann Ki Baat' ajanga nüburtem den jembidang Ato kilonseri sensotem dang, census agiba mapang bendenba data ajakji kümzüka ayutsü, anungji Census 2027 takok angutsü atema ajaki shilem agiang, ta ayongzüker.

"Medemertem, linük Census ya sorkar mapa dang masü, saka asenok ajak teinyaktsü mapa ka lir, nai shilem agitsüji

kanga tongtibang. Nenoki agütsüba osangtemji digital security ajanga kümzüka ayutsü," ta pai metetdaksü.

Modi-i, India nung agiba Census ya alima nung census tulutiba lir, aser senso ajaki iba indang ya rajema alitsüla, ta metetdaksü.

"Census 2027 ya digital asütsü. Osangtsüsang ajakji digital ajanga record asütsü," ta pai ashi. Kibong sema arur ketdangsertemi osang metetpela record asütsü atema parnok ket nung mobile application ka lir," ta pai metetdaksü.

"Medemertem, iba census nung shilem agitettsüsa iba inyakyim melamela kümtsüogo.

Tangbo nai nü sasa nü osang record sütettsü. Ketdangsertemi semdangtsü anogo 15 jelia nai self-enumeration facility angutsü, anungji nai nü sasa osangtsüsang agütsütettsü," ta Ato kilonserisa metetdaksü.

Kodang iba maparenji tembangdir nai mobile phone mesüra email ajanga unique ID ka angutsü, ta pai metetdaksü.

"Tesülen ketdangsertemi ner ki sema aruba mapang nai iba ID ji sayutettsü," ta pai ashi.

Self-enumeration agiba tesemtem nung census ketdangsertemi house-listing tenzükogo aser tang tashi nung kibong crore 1.2 indang house-listing renemogo.

### Tanü India aser New Zealand nati 'Free Trade' tezüngzüktep agitsü

New Delhi, April 26 (Agencies): Hombarnü India aser New Zealand na tsüngda Free Trade Agreement (FTA) agitsü; iba atemaji Ato kilonser Narendra Modi aser New Zealand Ato kilonser Christopher Luxon nati ken o ajak renema jembio, ta osang ka ajanga metetdaksü.

Luxon-i, iba ya putu ka nung khen agitetba tezüngzüktep ka asütsü, ta metetdaksü.

Luxon-i X ajanga, "Hombar aonung New Zealand-i India den Free Trade Agreement agitsü," ta metetdaksü.

Luxon-i, "Onoki India den Free Trade Agreement agitsü,

aser ibaji ajanga New Zealand exporters atema alima nung market tulutiba rongnung ka lapoktsütsü," ta metetdaksü.

"New Zealand nung asenoki inyakba mapa pezü shia nung kabo shishilembaba den sendaktepa lir, aser tang iba tezüngzüktep agiba ajanga New Zealand nung alu aser süngjanglu nung ano mapa aika adoktsü," ta pai metetdaksü.

Luxon-isa, iba ya ajanga tongtibang sectors aika nung export jenjang ano tajungba akümtsü, ta metetdaksü.

"Iba ya New Zealand atema takok tuluka lir, aser iba ya

ajanga asenoki alima dang ano taliba yoktettsü," ta paisa metetdaksü.

India Union Commerce Minister Piyush Goyal-ia, "Minister McClay küna mapang talangka o lemtepa sülen Ato kilonser Narendra Modi aser New Zealand Ato kilonser Christopher Luxon nati ajak renema jembio. Iba tezüngzüktep ya asüng agitsü," ta metetdaksü.

Yaküm Luxon-i India semdangba mapang nung India aser New Zealand na tsüngda FTA atema mezüng jembishinüa liasü.

### MHA-i Ladakh nung aliba teloktem den ken o jembitenzüktsü

New Delhi, April 26 (Agencies): Ministry of Home Affairs (MHA)-i asentenshir May 22 nungi tenzükta Ladakh nung telok balala den ken o jembitenzüktsü, ta Amongnü Lt Governor, Vinai Kumar Saxena-i metetdaksü.

Ladakh nung alirtemi state jenjang akhangba den külemi linük temzüng nung Sixth Schedule kübok Ladakh züngoktsü akhanger.

MHA aser Ladakh nung aliba teloktem tsüngda tesüsabuba senden amenbaji taküm February ita tetenzüklen liasü. Lt Governor-i X ajanga, "India sorkar Ministry of Home Affairs-i May 22 nü senden amentsü aliba atema kelia sub-committee senden akatsü telemtetba agiogo," ta metetdaksü.

Paisa, iba sendenji ajanga Ladakh nung lenirtem den ken o jembitsü atema lenmang lapoktsütsü aser Ladakh nung alirtem taginüba ataloktsü atema telemtetba agitsü, ta ashi.

Leh Apex Body (LAB) aser Kargil Democratic Alliance

(KDA) nati 2021 küm nungi tenzükta Centre sorkar den ken o jembia arudar.

Tawa KDA-i tangsa asentenshir ken o jembitenzüktsüla, ta takhangba agüja liasü. Ken o jembiba maparen menoba atema tawa KDA co-chairman Asgar Ali Karbalai-i sorkar dang mepelaba metetdakja liasü.

April 14 nü Lt Governor Saxena-i, tang teinyakdak maparen ajanga telemtetba tajung ka agitettsü imlar aser ken o jembiba nung paia yaritsü, ta metetdaksü.

Yaküm September ita nung Leh nung longkak aيتدang rara tulu adokba dak sendakba nung lenirtem kar pua liasü, ajisüaka parnok chiokba ajanga tensa tajungba kümogo.

April 18 nü taoba mapang J-K Member of Legislative Assembly Deldan Namgyal aser LAHDC Leh Councillor Smanla Dorje nata tepuokdak nungi chiokogo. Iba jakdang March 14 nü climate activist Sonam Wangchuk-a chioka liasü.

### AAP-i party toktsür MP tenet anentsütsü temepishiba agitsü

New Delhi, April 26 (Agencies): Aam Aadmi Party MP, Sanjay Singh-i, Rajya Sabha nung party MP tenet anendaktsütsü atema pai Rajya Sabha Chairman, C P Radhakrishnan nem temepishiba shidi ka agütsüogo, ta metetdaksü.

Tawa AAP MP teneti AAP toktsür BJP nung denogo.

Amongnü osangbenertem senden ka nung jembidang AAP Rajya Sabha MP Singh-isa, nüngdak dang süra pai ken o benoktsü, kechiyong party MP tem jagi anti-defection ozüng alema inyakogo, ta metetdaksü.

AAP-isa Rajya Sabha chairman dang, MP tenet ji AAP tickets ajanga Rajya Sabha nung shim, ajisüaka parnoki party toktsür BJP nung adener, ta metetdaksü.

Hokolbarnü AAP nungi Rajya Sabha MP tenet - Raghav Chadha, Ashok Mittal, Sandeep Pathak, Harbhajan Singh, Rajendra Gupta, Vikram Sahni aser Swati Maliwal nungeri party toktsür BJP nung aden.

Singh-isa, Uttarakhand aser Arunachal Pradesh dak sendakba ken otem densema Supreme Court-i agütsüba

obendang aika ajanga item ama 'defections' ajanga MP nung anentsütsü akok ta shiogo, ta metetdaksü.

Paisa linük temzüng nung 10th Schedule tetshia "iba ya ajanga item ama yimtenren nung 'defections' memelar," ta metetdaksü.

"Menoba ajanga tejashi angutsü saka nüngdak dang süra AAP-i iba ken o ya court nunga benoktsü. Item züngsemtem ya party-i shim saka parnoki toktsür tanga telok nung adentsü atema telemtetba agi. Iba ya Punjab nungertem ashioktsüba dang masü saka India temzüng-a ashioktsüba lir," ta Singh-i ashi.

AAP toktsüba MP tenet nungjagi parnok trokbo Punjab nungi lir.

Punjab nung AAP MLA kari BJP den tongtepratepdar ta osang prokba dak sendakba nung tasüngdangba ka langzüdang Singh-i, item ama osangji tiyazü aser ibaji BJP aser party toktsüba MP temi proker, ta ashi.

Paisa, MP kari AAP toktsüba ajanga party aser state ashioktsüogo ta shia Punjab nung nübur aika jashir, ta metetdaksü.



April 26, 2026 nü Howrah nung Uttar Howrah menden nung BJP candidate, Umesh Rai indang raodshow agidang TMC pusemertem aser BJP pusemertem tsüngda raradang tangokba noksa nung angur.

OFFICE OF THE  
LANGPANGKONG TZÜKONG MUNG DANG  
H.Q. Chuchuyimlang - 798614  
Dist. Mokokchung, Nagaland  
ESTD. 1933

---

**PELABA LEMSATEBER**

Asen lenir Shri. Tongpang L Jamir Advocate, Late Lipok Jamir Unger jabaso, pa Sokar mapa nung State Commissioner for the Rights of Persons with Disabilities Government of Nagaland, jenjang ngutetba asoshi LTM-i pelaba lemsateber, ano maneni pa wadang Tsungremi takokma nung moajangma.

Sd/- (N.WATITOSHI) President LTM

Sd/- (R.NUKSHI LKR) Gen. Secretary LTM



## TIR YIMYIM YIMOBILEM (EDITORIAL)

DIMAPUR MONDAY, APRIL (RONGCHII) 27, 2026

### Ak shi agi meperir

**N**agaland nung alir Naga nungertem ya shi achir kin lir aser shi-sa asüyonga Naga nungertemi ak shi-sa techinüba, anungji India nung ak shi achir noklang shilem nung roker (60%) bo Nagaland nung lir ta asadangtetogo ta yakanü Kohima nung 'World Veterinary Day' amongba sentong nung metetdaksübaji, taoksatsü aser tesasatsü osang ka amato masü saka asenok asoshi mapa angudak aser rongsen moludak tesem tajung ka sayur amato asenoki agitsüla. Atangji, asenok asoshi takok osang kaji, asenoki Nagaland nung ak metsüba agi asenok nungdak noklang shilem nung lir (40%) bo periteta metsüteter, anungji tanungba 60 % nungdakbaji tongteta ak metsütettsübaji Naga nunger, talisa, lanurtem asoshi mapa tajung angur asütsü. Ano, Nagaland asoshi osang tajung kaji, India nung anguba ak shi rongnung Nagaland nung metsüba ak shi-sa tajungba, anungji asenok peri ak metsütsübaji dang masü saka ano tangaleni yoktsübajiang asenok asoshi tajangzük tuluba asütsü. Aji oda, India nung Nagaland nung metsüba ak shi-sa tajungba ta asüba tetezüji tebang dang ajungba dang masü saka temang asoshia asenoki metsüba ak shi-sa tajungba ta tendangtetba osang lir. Anungji, bendang lima nung tatishitsü agi, Delhi nung ak shi ayokdak ka nung 'Nagaland Pork' ta zülua yur ayok nung, talang nungi asüyonga nisungtemi bushia arua ajiang alitsü. Aji oda, iba dang nung jagi sentong tuluba bilema, Nagaland nung dang "Meat Processing Industry" lapoka yangji dang asenoki metsüba aktem alidena aleptsü aser shiji lepsar packaging asütsü aser iba package tema nungji 'Nagaland Pork' ta kisung zülur alima tesem balalai yok nung raktepa alitsü, kechiyong joko alimai Nagaland nung metsüba ak shi-sa tajungba ta meteta lir. Iba osang ya lanurtemi government mapa inyaksü asoshi 'post 5000' atema advertisement adokba dang nungi terben agi osang tajungba ta agizüktsüla. Atangji, ak metsütsübaji mapa temelabo masü saka mapa inyaksü meteta janrartem asoshibo mapa ajak melamelaa dang tajangzük lia inyaktettsü. Tangarbo aluyimtsü mesüra shiruru metsütsü asoshi inyaknüaka ali maka saka asenokbo asen tsürabur lima nung ali peria dang lir, anungji alu mashi ka lepboka mesemteter yangji tzü mesüa bener arua yur, alu nungjisa manü, menti aser ponglashi lu yima ak noklang aika metsütettsü. Atangji, ak an metsütsüba ya metsünüaka nisung aikati arendaker, kechiyong aiben shiruru wara metizüktet remoka süa adoker. Ajisüaka, tanü asungbo veterinary doctortemi anepalutsür aser ak an asüyonga government nungi temenok angutsüsa asenok nisung taküm 'Life Insure' asüba amato ak shiaji 'Insure' süa ayutsü akoker. Atangji, asenoki ak aika memetsüaka, kibong shia amato, pei kidang chitokendok chidaktsütsü ak ka mesüra anabo metsür, anungji asenok aikati ak junga metsütettsüba yimya aser wara nungi kümzüka metsütettsü indang meteta lir. Aji oda, ak metsür kari ashiba agibo, ak ya nisung ama tamen achiba shiruru masü, anungji süngolemba aser wano amala chyongtsübo tazü agütsü tajungba aser ak metsüdakji tzü peria alitsüla, kechiyong parnokji anogo shia kenbo tzü agi temang metena aientsüla aser teti tzü tajemtsü peria yutsütsüla. Iba ama shiruru metsürtemi peisasa angazükba aser ajangshiba yimyatem agia shirurutemji wara nungi kümzükteter. Aji oda, asenoki dang ak junga metsüteta ita shia ak teyu asem danga yoktetra, ibaji government mapa nung gazetted officer ka ita sen dang nungibo kanga agia teimba asütsü. Tanü asenok lanurtemi government mapa bushiba ya lenmangbo tajung aser tesadem aser aotsübalen tetuyuba shitak agüja lir ser nung, tenük apokba agi lenmang mangu nemzür amai lir. Tanü yangi ak indang jembir dang ashi, tanübo nashi dang masü saka mamatzü kanga junga agütsüba janga dena metsür. Itemji Naga lanur, talisa Aor chanu, shibaibo meinyaktettsü ta bilemer ?

## OLEMSABANG

### NLTP ACT 1989 AJANGA NAGA KHRISTANTEM TELOK ANA LEMSAR OTIA RARATEPPER.

- K. LIMA LONGKÜMER

NLTP ACT 1989 ozüng akaba ya nisung, ali rongsen samaa timtemsetter ano nisung daküm sümadaktsütsüba macü saka alima aneptsüba mozü lir. Yi (Rum) Drugs, Cigarette, Pan aser sata (Talab) achertem ya ajataket, tiyaksang, Asüküm aser jatabuta nisungtemi nüpur matsüngdang nümadanga chetepper, Temeshi Laishiba nung chetiyongti tesü ta zülua lir aser Chetiyongtirji sensak tiai ayir takah zülua lir. Ano tasütsü rnema alir nüm yi chemdakjang takah zülua lir. Laishiba tegong zülua magütsüyonga chea achemmertemia metetta lirji ni Laishiba tegongbo magütsür "Tepoki aiba agi menentsür macü saka adokdaktsüba agi nisung menentsür takah zülua lir, chea achemmertemi Laishiba den asaya menüa jempibaji onoki adokdaktsür macü onok tepoki yokba agi shinga memenentsür ta ajak bang nungi tiluja jempir, ajisaka yi achemmer-i alima temdangsünga aser kibong lureptsür, Sali aser moko achertemi alima janah menentsür, Drugs achertem tanur masotsü, kar asortemji tenüktelen mapensa sotsür, item ama nisungtem jagi nisung mulung yirua koremtsür, taktsü maküt, Ajataküt Chetiyongtir jagi yimti yimtong nung nisungi ngua metzümeshir parnok dangji Azü ama ta ajar.

Nagaland Dry State ta alima dang sangdang aji oda süaka mapa agibo Dry State mataloktsütetter, aser aji ajaki metettaka inyakim ka melenshidangdi ta shisatetterbo shinga mali, Naga nüpur ajungai Sorkar-i temulung magütsür, tenüng akidang inyaker ta jempir külen sorkaria Arogoia mapa inyaksüla ta dang aitsütepper. Ajaki süjen anar koya apotsü merangba amai jilobanglotepper, ajak kibur cürnung tamakok ajurudangbo kibur kümnür mali.

Nagaland nung aliba nisungtem ya ajak Khristan kümmar jogo küm noklang temma tamanger lia arur, Arogobo thangar Arogo dang nungi tampo rakteppa jubilee rongsen indokka benjungtepper, Arogo tenzüka jubilee tenüng nung Jubilee amunger aji süaka Khristar Arogo Jubilee macü alima shenung benjungtepper, ibajagi Aor Arogo küm 53 rarateppa arudar. Yisu-ibo Jubilee amungtsü shia mali. Yisu-i mashiba inyaker-ji aibelener, anungji asenokji shiba dak amanger acütsü. Asenoki Nagaland for Christ tabo nungka mekah aser aji Naga nunger ajak asoshi naroküm tenüng aja, aji saka tenüng ajaba ama Khristan macü nisung tepsetter, rakzükrakter, aohyateptsü nung kibur düsa, Rape süteptsü, nüktapangtateptsü, yi agi longa oa chemteptsü, item chirtem tenüngbo Imsümoa, Imsütushi nisungsangbo kecha makanung tenüngbo Temsükaba ajar, konangnüksang bushiba Khristantem.

Naga nungerbo Tsüngrem tenzükker-i anir mulumi-i temshia omatsü. Naga nungerbo tenüng agi acüyongjia Khristan State ta jempir, India linük ya Hindu nunger 90% agi timba aliba linük aji saka Hindu State aeka nung yi nokdangba state 5.6 tashi lir, iba nungji NorthEast Statebo mezüngsem. State Assembly-bo küm nung 2 or 3 pen amentsü ajisaka yi nokdangba nung tamakok anguba kün danga süokka jempia mangashika. Nagaland nung MLA 60 brong Khristan, parnokia komasa pilemdar-na? ajisaka parnokia NLTP ACT akintsübo mejangrae alitsü, Ibajangiang taoba küm Nagaland Minister Shri. K.G. Kenye, Power & Parliamentary Affairs-ibo NLTP ACT 1989 yanglushidi ta Naga nunger den paper ajanga tepilemba lemsatep, iba osangji angashir iba shity pelasetta akizükker ta shiti tajung NBCC nungi langzua koba mapang tajungba acütsü aser ozüngji sorkar-ia koma pilemer, onokia yamaibo inyaker ta ou tajung jimpia mesüzükra asenoki akinüba ataloktsübajia liasü ajisaka sorkar tashemait aeka tutetta nisung aekati züluba du agi sorkar pilemba-a matalok, asenok metumera shiti züluba jagi tazüngla nung züluba shiti aküm.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

# Kohima nung aliba Arogo anati azü unit 47 tenla agütsü



**Kohima, Rongchii/April 26 (TYO):** April 25-26 anogotem nung Kohima nung aliba Arogo anati ayongzükba azü tenlaba camps nung azü unit 47 tenla agütsü.

April 25, 2026 nü Faith Harvest Church-i Arogo küm 25 ajungba nungtem nung azü tenlaba camp ka ayongzüka liasü. Arogo meyong hall nung ayongzükba camp nungji nisung

40-i azü tenla agütsü. Department of Transfusion Medicine, Naga Hospital, Kohima nungi ketdangsertemi azü agizüka bendenba maparen nung yaritepa liasü.

Ano külen April 26 nü Salvation Army Church (Mizo Fellowship)-ia Northeast India nung par Arogo tenzükba sülen küm 109 ajungba nungtem nung Naga Hospital, Kohima nung

azü tenlaba camp ka ayongzüka agi aser iba camp nungji azü unit 7 tenla agütsü.

Salvation Army Church (Mizo Fellowship)-i 2025 küm nungi tenzükba mapang shia azü tenlaba camp ayongzüka agir. Nungdabapurtem yaritsü, lokti tenzükba aser Khristan mission mapa dak sendakba nung parnoki azü tenlaba camps ayongzüka agir.

# ANO GO ABEN TSÜNGREM DEN

## Tesütep nung aliba

*"Kechiyong tasüba süshia, taküm süshia... asen Kibuba Khrista Yisu dak aliba Tsüngrem temeim nungi asenok piladaktsütsü makoktsü, ta ni chichia amanger". - Rom 8 : 38-39.*

Kodang ni aso, ni ya tebu ka liasü. Ni kübu jabaso aküm. Iba azü tesendaktep melenshidaktsütsü akoktsü asü? Ni kidang nungi jena or kü tenüng melenra iba tesendaktepji melenshitettsü asü? Ni pa jabasosa asütsü asü? Atangji! Azü tesendaktep kecha agia melenshitsütsü makok. Saka iba tesendaktep raksatsü asoshi ni langka inyaktsü akok asü? Au, atangji! Iba tesütep tesendaktep kü libaliro ajanga aiben raksatsür.

Tanelaren kodang ni tanaben aso ni Tsüngrem kidang züngsem ka aküm. Tsüngrem kü Bu aküm aser Yisu Khrista azü ajanga Pa den teti tatem maka tesendaktep nung ni pela. Pa taochi koba ni tamang ajanga agizük iba ajanga ni tanela nung Tsüngrem den telungjem küma Pa chir ka aküm. Ni kodang Tsüngremer kibong nung züngsem ka aküm tesendaktep tebilemetsü ajak sünepa aküm. Saka ni iba tesendaktep raksatsü akok asü? Au, ali tebu den tesendaktep ama dang Tsüngrem den tesendaktep lir : tashi angaba kodang ni tashi mangalir tesendaktep raksar. Meimra tashi angar. Asenoki tashi mangaba tesendaktepji metokdangi alir kechiaser ibai azü ajanga yangluba lir. Pauli pa Tsüngrem temeim nungi kechaia piladaktsütsü makok ta ajang ajanga amang. Yisui ashi, "Kü santemi kü ola angar" (Yn 10: 27-28). Tsüngrem dang tashi angang aser na Pa den sütepa alitsü.

# Uganda nung evangelistic sentong agiba sülen sayutsüngir ka tepset

**April 26, 2026:** Tawa Uganda nung sayutsüngir kati evangelistic sentong ka nung sayutsüngiba sülen Islam yimsü alia amanger Muslim nungeri kari pa tepset.

Kampala kübok Namungoona nung sayutsüngiba sülen Alfred Kitenga aser pa kinungtsü, Anne Grace Nabirye na meyipa aoba mapang Kawaala, Wakiso District nung 9:30 ako meta pa tepset.

Evangelistic sentong tembangba sülen mejangjaba nisung pezüi parnok motorcycle taxi driver tem lir aser parnok-

a sentong nung denogo, ta shia tena dang nena dang nungi sen magii ki tongtsütsü ta ashi.

Osangbener den jembidang Nabirye-i, "Künati parnoki ashibaji amang aser parnok-a Khrista dak amangertem lir ta künati bilema liasü. Par pezü rongnung nisung kati tanga oshi ajanga phone nung kanga jembiba agi ni melung melemi bilem. Iba mapang nungji ano tebur asem arusemba sülen küna dak azük. Parnoki kü kinümbu kotari agi mejungi yirutsü aser ni anasa aliba ki kati anir otsü," ta metetdaktüsü.

Iba tatalokba sülen lai Arogo

nung züngsemtem nem iba osangji metetdaktüsü.

Arogo nung lenirtemi ashiba agi, Kitenga ya bendanga agütsüba sayutsüngir ka liasü; talisa pai Muslim nungertem rongnung sayutsüngitsü kanga jangraa liasü, ta ashi.

Arogo nung lenir kati, "Iba ya Khrista temang nung takoksa tuluka lir. Mangyimer kibong atema sarasademjang aser pei akok nungita yariang," ta metetdaktüsü.

Ketdangsertemi iba tatalokba bushisüngdang tenzükogo aser tang tashi nungbo aibelener shinga mapu.

# Russia nung jail ka nung sayutsüngir, Bozhiy sür lia angu

**April 26, 2026:** Blogger aser sayutsüngir, Khristolyub Bozhiy tan ita Russia nung jail ka nung sür lia angu.

Internet nung arrshi küm 43, Bozhiy dang 'Vegan Christ-Lover of God' ta ajar.

Pai indang blog aser YouTube channel ajanga pai Khristan yimsü indang, shi antzü machitsü, Ukraine nung rara aser yimjung atema tayongzükba agüja aru.

Pai Islam yimsü anema jembiba den külemi Ukraine nung raratsü atema tepuokdak alirtem shimba anema jembiba aruogo.

2023 küm November ita nungi tenzükba Russia nung ketdangsertemi pa anema bushisüngdang tenzükba liasü aser yaküm February ita nung Voronezh Regional Court-i pa küm asem tepuokdak ayutsü obendang agütsü.

Muslim nungertem jashidaktsüba atema pa aija liasü.

Taküm April ita tetenzüklen pa pre-trial detention center kati anir ao aser pa kija takdang ka nung puoka ayu.

Tan ita tetenzüklen pai, "Ni iba centre jagi anir aoba sülen anogo pongunü tashi kü kija

takdang ka nung puoka ayu. Iba sülen ano anogo 15 puoka ayutsü metetdaktüsü," ta pai metetdakja liasü.

"Pa IK-2 administration den tesendaktep mejungi liasü aser tepuokdak alir kar den-a mangatettep adoka liasü," ta tebu metetdaktüsü.

April 17 nü Bozhiy tebu par jabaso asüba osang angashia liasü saka pa kechi kuli ajanga asüar pa nem memetetdaktüsü.

April 20 nü tebu dang par jabaso temang abeni arutsü metetdakja liasü. Iba anogo nungji ketdangsertemi tebu dang, ner jabaso lisü agi alenseta asü, ta metetdaktüsü.

Ajisüaka Bozhiy'er kinüngertemi pa soseta asü ta ketdangsertemi ashibaji mamanger.

Tesüiba ita ka tsüngda Russia nung tepuokdak pa densema nisung asem süogo, anungji parnoki ketdangsertem dak melung malemer.

Bozhiy-i tatemang süa longkak aitba mapang nung pai amer aliba ozülu nungji yamai zülua liasü, "Yisui tsükchirtem metepsettsü saka meimtsü sayu, kechiyong Tsüngremji temeim. Nisung tepsetertemi Tsüngrem yimli senmang mamangtsü."

# 'America Reads the Bible' nung Erika Kirk-i Khrista shia aruba Lai azüng



Erika Kirk & Franklin Graham

**April 26, 2026:** April 24, 2026 nü 'America Reads the Bible' marathon nung Turning Point USA CEO, Erika Kirk-i Yisu Khrista tasü nungi shia aruba Lai tekongtem azüng.

Kasa anogo nungsa sayutsüngir Franklin Graham aser The Chosen film director, Dallas Jenkins na densema aikati shilem agi.

Laishiba tetenzük nungi tatembang tashi azüngba sentong ya Washington D.C

nung aliba Museum of the Bible nung Hombarnü tenzük aser Honibar aonung tembangogo. Iba sentong agiba ajungaji Great American Pure Flix nung live stream süa liasü.

Hokolbar aonung 8:00 ako nungi tenzükba Erika Kirk-i Luk tapu 24 azüng. Iba Lai nung Yisu leper taziung anguba aser Yisu shia aruba sülen Pa sülen anidakertem aika matsüngdang Pai jungkai adoka sayuba otsü lir.

Kasa aonung "The Chosen"

director Dallas Jenkins-i Mark tapu 6 azüng, sayutsüngir Franklin Graham-i Luk tapu 10 azüng, business inyaker Kathy Ireland-i Luke tapu 21 aser Governor Sarah Huckabee Sanders-i Yohan tapu 1 azüng.

Hopta tetenzüklen US Tir Donald Trump-i Oval Office nungi 2 Putipuyang 7:11-22 azüng. America Reads the Bible nung US Tirtem rongnung mezüng shilem agisangji taoba mapang US Tir, Ronald Reagan liasü.

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Yakyakshiyak**

(adv) kara karar, jeretpret, teyakyak ( smartness, alertness)

\* Yakyakshiyak sempet malirtemi tangar memeneptsü.

**Yalayashi**

(adj) rongsen talubosa akaba aser amshiba ( use abundantly)

\* Asen lima nunga ali rongsen yalayashia akaba takar karbo lir.

**OLONG PAITEP # 7486**

1					2				3
							4		
5		6			7				
8									9
							10		
				11	12				
		13							
14					15				
				16					

**TIPLIN**

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüik asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

**LANGTSÜNGLEN**

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

**OLONG PAITEP # 7485 TELANGZÜBA**

**TIPLIN :**

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kiochtsü, 17. Itsük,
- 18. Kar.

**LANGTSÜNGLEN :**

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

**NAI-A YA METETTER**



Kiyomura Corp. ta ser Japanese sushi chain operator kati "most expensive tuna" otsü yangluteta lir. 2026 asoshi mezüngbuba auction nung parnoki bluefin tuna ka 510.3 million yen (RM15.5 million) ajanga alizüka liasü aser iba ajanga Guinness World Records naroküm angu.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**NIT Silchar nung tamangba yimsü sentongtem noktanger**



**Guwahati, April 26, 2026**

(Agencies): National Institute of Technology Silchar-i campus nung sarasadem mesüra tamangba yimsü dak sendakba sentongtem ayonga magitsü tetuyuba agütsüogo.

NIIT Silchar nung hostel boarders, mess workers aser hostel facilities den sendaktepa alirtemi campus nung item sentong magitsüla ta Dean of

Students' Welfare office-i metetdaksü.

Bangdakpur nungi temelaba anguba sülen tang nungi iba mapa tenzüker ta April 24 nü sangdong ka nung metetdaksüogo.

Hostel facilities nung alir mesüra sendaktepa alir shingiaia hostels mesüra campus nung sarasadem sentong, tamangba yimsü sentong mesüra item mesükba sentong nung shilem magitsüla ta sangdong

nung shia lir.

Iba tetuyuba sülen manidakertem ozüng tesashi agi merenshitsü aser disciplinary action alitsü ta parnokisa ashi.

Iba tetuyuba indang shiditem ya Director, Registrar, Associate Deans of Students' Welfare, wardens, assistant wardens, estate officials, housekeeping in-charges, mess caterers aser kaketshir ajak nem agütsüogo.

**Seppa nung National Panchayat Day amung**

**Itanagar, April 26, 2026**

(Agencies): Arunachal Pradesh kübok Seppa nung "Atmanirbhar Panchayat Se Samridh Bharat Tak" omen nung ajemdaker National Panchayat Day 2026 mungogo.

East Kameng district nung amungba sentong nung

Women & Child Development Minister Dasanglu Pul-i tongti tesemdang ama shilem agi aser tetushi süa jaokerji Tagru Kasha liasü. Maneni, Home Minister Mama Natung-ia sentong nung shilem agia liasü.

Local MLA Ealling Tallang-i

o jembidang Panchayats tashi itdaksütsü, tashishitsü melii inyaksü aser terenlok bener arutsü indang ashi.

Sorkar ketdangsübaren nung yimtsüngtem ya tongti asütsüla aser teküpoktiba jenjang nungiang terenlok tenzüker ta Tallang-i ashi.

**Guwahati nung mozü shibelener tetsür 4 apu**

**Guwahati, April 26, 2026**

(Agencies): April 25, 2026 nü Guwahati kübok Amingaon area nung Assam police-i tetsür pezü puogo aser parnok ket nungi heroin aika ngutetogo.

Demthang Haokip (36) ta ser "narcotics courier" kati anir tetsür couriers telok kati Amingaon nung drugs agütsütsü sentong aliba osang tejangja ka angazük ta police-i ashi.

Parnoki drugs ya lower

Assam nung lemshitsü atema liasü aser iba osang angashir Guwahati police telok kati mita ao.

Idanggi police-i iba telok sot aser tongti temulung malemba nisung den tetsür asem apu. Parnok ket nung sapon pongdang 62 bena aliba angu aser item nung heroin gram 837 shi bena liasü.

Parnok ket nung apuba heroin indang jenjangji Rs 7 crore shi

alang asütsü ta ketdangsürtemi ashi.

Tanüngba nisungtemji Lam Neikim (25), Hoineigah (24), Kim Neithen (36), aser Ngah Pi (30) nunger lir aser parnok ajak ka Manipur kübok Churachandpur district nungi lir.

Parnoki lower Assam nung belenshitsü atema drugs bena liasü. Iba dak sendakba nung maneni bushisüngdang südar ta police-i ashi.



**Nagaland University**

(A Central University established by the act of Parliament, 35/1989)

Department of Teacher Education  
Kohima Campus, Meriema, Kohima-797004, Nagaland

**NOTIFICATION FOR B.Ed. ADMISSION IN NAGALAND-2026  
CET B.Ed. (Nagaland)-2026**

Online applications are invited from the eligible candidates for admission to B.Ed. regular course of two years for the academic session 2026-28 in various government and private colleges of teacher education across Nagaland State. All the candidates who meet the eligibility criteria for this course can apply online from 27-04-2026 onwards. For more information visit the website of Nagaland University;

(<http://nagalanduniversity.ac.in/English/>) or (<https://admission.nagalanduniversity.ac.in/>)

Date of Commencement of Filing Online Application Forms	27-04-2026
Last Date for Submission of Application Forms	25-05-2026
Date (Time) of Entrance Test	11-07-2026 (11:00am to 13.00 pm)

CONVENER  
CET B.Ed. (Nagaland) -2026

# Netanyahu-i army dang Lebanon nung Hezbollah amaktsü tuyur

**Tel Aviv, Rongchii/April 26 (Agencies):** Israel Ato Kilonser Benjamin Netanyahu-i par mitkartem dang Lenanon nung Hezbollah targets tem tashi ajak amshia amaktsü totuyuba agütsüogo, koba ceasefire ka hopta asem agi atsülanger anogo ana lir iba osang ya angazüker.

Honibarnü Israel-i southern Lebanon nung amakdang nisung trok tepsetba sülen iba totuyuba ya agütsür.

Ano maneni linük ana tsüngta arütsü alema khatepba aruba ajanga ceasefire nung tashi maitba sayur.

Iba ceasefire yagi rara tajemba akum saka jungjunga manen, aser Washington nung linük ana nungi envoys tem jembishinü akaba sülen Bresthostibarnü atsülanga liasü.

Honibarnüa Israel-i Nabatieh district kübok Yohmor al-Shaqeef jila nung truck ka aser motorbike ka nung amakdang nisung pezü tepset, ta Lebanon indang health ministry ajanga ashir.

Ano Bint Jbeil district kübok Safad al-Battikh jila nung amakba nunga nisung ana asü aser 17 yiru ta ashi.

Israel Defense Forces

(IDF)-i, Honibarnü Hezbollah züngsem asem samatsüogo, shirnok nok-nü bena aliba gari ka anir liasü aser ka motorcycle ania liasü ta ashi.

Ano Litani area nunga iba telok nungi züngsem ana tepset, kong Israel-i par sasa sangdongba buffer zone nung sepaitem yua lir aser itemji southern Lebanon nung aliba IDF sepaitem asoshi timtem keta liasü, ta ashi.

IDF-i mapang tatsüka lir Malkia nung temulung melemtetba aerial target ka jangjatet aser iba ya ceasefire nung aibelen lir ta ashi.

Kasa mapang Hezbollah-i Yohmor al-Shaqeef nung amakba tayang kepzüka south Lebanon nung Israeli army veicle ka amak ta ashi.

Netanyahu-i Hezbollah telok dak amaktsü totuyuba agütsüba sülen Lebanon sorkar meyong National News Agency ajanga ashiba agi, Bint Jbeil district kübok jila ka nung anaben amak aser ano Tyre district nunga jila ka nung amak aser Nabatieh district nunga jila ana nung amak.

Israel mitkari ashiba agi, southern Lebanon nung military asoshi amshiba Hezbollah

kiralongrar indang ki o jen nung amak. Israel nunger civilian aser IDF sepaitem asoshi lendong timtem aliba anema maneni raratsü ta ashi.

Israel-i maneni southern Lebanon tuluba amokbanga lir aser yangji tesem aika raksatsüba mapa inyaker.

Israel-i Bodhbarnü amakdang asürtem rongnung osangbener ka dena liasü aser Honibarnü Lebanon nung osangbener alidak amakba magizüker ta international press advocacy group kati ashi.

UK dena aliba linük balala indang partnership, Media Freedom Coalition (MFC)-i telok ajak dang media sadem-sadema aser timtem majurui inyadaktatsü ayongzüka liasü.

Israel-i amakdang Amal Khalil tepset, shiba Lebanon nung osangkaket ka asoshi inyaker aser freelance photographer Zeinab Faraj yiru.

Lebanon nung aliba ketdangsür temibo parnok jakdang gari ka nung tayimtsü amshia amakdang nisung ana tepsetba sülen parnok ya ki ka nung jenoka lia asaa tenük yoker amak ta ashir.

IDF-i osangbener dak mamak ta ashir.

# Russian defence minister-i North Korea semdang

**Moscow, Rongchii/April 26 (Agencies):** Russia Defence Minister Andrei Belousov North Korea tongaogo, ta Russia defence ministry-i Deobarnü sangdong ka ajanga metetdaksü.

Belousov-i tang Pyongyang semdangba ya tawa Russia nunger ketdangsürtemi Pyongyang semdangba tanabuba asütsü.

Taoba mapang North Korea state media KCNA-i, Russia indang State Duma mendenbuba Vyacheslav Volodin Pyongyang tonga aruogo, aser pa Ukraine rara nung asüba North Korea nunger sepaitem nungdem nung yanglutsüba memorial ka lapokba sentong nung adentsü ta metetdaksü.

Belousov-i North Korea nung tongtibang lenirtem aser military ketdangsür tejentem den sensak asemstü aser sentong balala nung shilem agitsü, ta Russia defence ministry yagisa metetdaksü.

Kasa mapang nung iba memorial lapokba tenung nung Russia tir Vladimir Putin-i North Korea lenir Kim Jong Un dangi telegram ka yokogo, ta Kremlin-i ashi.

Anüolen Kursk tesem nung Ukraine nungertem nokdangtsü atema Russia nunger sepaitem nem teyari agütsüba atema Putin-i Kim aser North Korea nunger sepaitem dang kanga pelaba lemsatep, aser ashiba agi, linük ana maneni tesendaktep

akangshia aotsü imla ataba lemsatepa liasü.

Kim aser Putin na 2024 küm June ita ajurutep aser mutual defence pact ka densema comprehensive strategic treaty ka nung sign asü. Linük ana tsüngda 2023 küm sülen kanga kara diplomatic aser military tesendaktep yangluogo.

White House sentong ka nung injang khaloktsü, Trump dak mekongshi

Washington, Rongchii/April 26 (Agencies): Washington, D.C. nung tongtipang nisungtem adenshiba sentong ka alidang security personnel dak injang khaloktsü ta tai tonglojka alisang arishi küm 31 tain Cole Allen-i Trump administration dak sendaka aliba ketdangsürtem dak tenük yoktsü tebilemba liasü ta bushisüngdang tem dang ashi. Ozüng amshirtemi asüngdangyaba mapang Allen-i pa tebilemba lemsatepa liasü. Ajisüaka pai US Tir Donald Trump dak tenük yokba indangbo mashi, ta ketdangsür temi jangjatsü.

Allen-i pa tebilemba lemsatepdang "administration officials" ta dang amshi, ta ozüng amshirtemi ashi.

Federal Bureau of Investigation-i kuli bendentsü atema Allen'er ki sapangogo. US Tir Donald Trump aser First Lady Melania Trump dena aliba sentong nung pai injang khaloktsüba sülen par ki ya sapang.

California kübok Torrance

nung aliba ki ya federal agents aser local police temi shibang, ta ashir. Parnok ya Central District of California nunf federal judge nungi search warrant agütsüba ataa lir aser iba temelaba agütsüba sülen parnoki iba ki kakkoka bushisüngdangtsü.

White House Correspondents' Dinner mapang injang khaloktsüba atema osangbener den jembidang, pa dak tenük yoka liasü asü masü ta asüngdang dang Trump-i "Yamaji alitsü südi ta bilemer," ta langzü.

Honibarnü Washington nung aliba White House Correspondents' Dinner mapang iba lendong ya atalok, kong osangbener, ketdangsür aser nübur temi jangja meteta aliba nisungtem adenshir.

Prangbong bena alisangi security personnel dak injang khaloktsüba sülen Tir Trump aser First Lady Melania Trump iba tesem nungi kanga keraa anizüker ao.

Prangbong bena alisangi Secret Service agent ka dak injang khaloktsü, saka pa bulletproof vest agia aliba mechi kumzük. Iba lendong ataloker mapang tatsüka lir Trump-i agent ya junga lir ta ashi.

Iba sentong nung aliba federal ketdangsür ajunga kumzüka lir, aser temulung melemi alisang ya police temi puogo. Iba sentong ya anogo 30 tsüngta mapang shimshir agitsü, ta Trump-i ashi.

**Office of the  
Mokokchung Senso Telongjem  
Mokokchung Town  
TENÜNGSANG AGÜTSÜR**

**Kr. Lipoklemla Jamir,**  
D/o Wb. Bendangtoshi Jamir, NBSE kübok 2025-2026 HSLC tatidang nung top 19 jenjang ngutetba asoshi Mokokchung Town nung alir yimer yimsanger ajak tenüng nung Mokokchung Senso Telongjem Mokokchung Town office ajanga tepela lemsateper aser khonang nüngsang tulu agütsür.

Tarutsü ne shisaluyimba lenmang ajak nung Tsüngremi maneni moajangma.

**Sd/-  
Supongmayang Kichu  
President, MSTMT**



**Sd/-  
Lisosungkum  
Secretary, MSTMT**

**Office of the  
SALANG CLUB LONGSA  
Mokokchung: Nagaland-798601  
KONANG TETSUSHI AGÜTSÜR**

**Kr. SUNGJEMTULA LONGSA**  
HSSLC AO TOPPER 2026

Kr. SUNGJEMTULA Longsa, D/o. Wb. Tajungrenba & Wt. Tiarenla, 2026 HSSLC tatidang nung AO SUBJECT TOPPER, Mayangnokcha Govt. Hr. Sec. School, Mokokchung nungi takok tulu ngutetba asoshi Tsüngrem tenüng sanga takoker nem tenüngsang agütsür.

Iba den HSLC & HSSLC tatidang nung Salang Club sanger kaketshir shimokisa takok tajung nguogo, nenok ajak dang SCL office ajanga takok pelaba lemsateper. Tsüngremi nenok tarutsü wadang ajak nung maneni moajangma.

**Sd/-  
(TSUKNUNGCHIBA)  
President, SCL**



**Sd/-  
(MOALILA)  
Secretary, SCL**

# Mali Defence Minister Sadio Camara tepsetogo

**Bamako, Rongchii/April 26 (Agencies):** Mali kübok tesem balala nung military amendaka aliba tesemtem amakba sülen Defence Minister General Sadio Camara tepsetogo, ta source balalai Al Jazeera nem metetdaksüogo.

Kati garrison jila nung par ki amakba sülen pa asüba osang ya Deobarnü metetdakja liasü. Honibarnü al-Qaeda den sendaktepa aliba telok ka aser Tuareg rebels temi sentong yanglur mapang ka nung dang tesem balala amakba mapang pa tepseta liasü.

2020 aser 2021 küm atonga military-i sorkar atsüngba sülen pa ya military sorkar nung tongtibang lenir ka liasü.

"Pa ya military lenirtem rongnung tongtibang ka liasü aser karibo pa ya tarutsü nung mali lenir akümtsü ta bilema liasü," ta Al Jazeera osangbener Nicolas Haque-i ashi, shibai Mali nungi osang balala yokdar.

"Pa asüba ya linük armed force tem atema takoksa tulu lir." Haque-i ashiba agi, item teloktem yagi gari nung bomb enoka bener oa Kati nung Camara'er ki amak. Iba jila ya military jila ka lir, koba linük yimtiba Bamako nungi km15 shi pilar lir, kong Interim tir Assimi

Goita-a alir.

"Kati ya linük nung ajak dang nungi teküzükba kübok aliba jila ka ama züngshir, saka al-Qaeda-den sendaktepa aliba Jama'at Nusrat al-Islam wal-Muslimin (JMIN) aser Azawad Liberation Front (FLA) nungi Tuareg telungpurtemi iba yimti maktetogo," ta pai ashiba den, Goita bo taküm lir ta metetdaksü.

"Iba jila amakba mapang pa tekümzükba tesem kati anir ao, anungji pai military nem maneni tetuyuba agütsüdar," ta pai ashi.

Kasa mapang nung item teloktem yagi Mali kübok Bamako, Gao, north len Kidal aser linük teyong nung Sevare yimti nunger densema tanga tesemtema makogo.

Haque-isa, Deobarnüa Kidal nung bomb apokba aser injang khaloktsüba ola maneni angashidar, ta iba tesem nung alirtemi shiogo, ta ashi.

Analyst Bulama Bukarti-i ashiba agi, taruba anogotem nung tongtibang tesemtem atsüngtsü atema maneni raratsü akok. Paisa, taoba mapangbo telungpur teloktem kati ka den raratepba liasü, saka tangbo longjemer parnok tsükchir Mali den raradar asüning tensa balaka asütsü ta ashi.

## Thomas & Uber Cup 2026: India tetsür team-i Ukraine kokogo



**Rongchii/April 26, 2026 (Agencies):** Deobarnü Horsens, Denmark nung Thomas & Uber Cup 2026 Group A tanabuba asaya nung India tetsür badminton team-i 4-1 agi Ukraine tetsür badminton team kokogo.

Iba asaya nung asayar tejen PV Sindhu masayadaksüi anisüngzükdaksü aser lanur asayartem dang asayadakja liasü. Mezüngbuba kija asaya nung Unnati Hooda-i 21-19, 22-20 agi straight game nung Polina Buhrova koka liasü.

Iba sülen Tanvi Sharma-i game asem kanga meranga asayar Yevheniia Kantemyr 21-12, 17-21, 21-10 agi koka parnok 2-0 agi tejakdang aküm.

Tasembuba asaya nung 2026

Thailand Masters champion Devika Sihag asaya. La nem tasembuba kija asaya asayatsü asoshi maongka agütsü.

Iba maongka ya takok tashi agia lai Mariia Stoliarenko 23-21, 21-13 agi koka tarep asaya metenzük tsüngda India team-i asaya kokatok.

India tetsür team-i mezüngbuba tarep asaya dang mekoki liasü. Iba asaya nung Kavipriya Selvam aser Simran Singhi nati 11-21, 17-21 agi Buhrova aser Kantemyr na makok.

Tanabuba tarep asaya nung Tanisha Crasto aser Sindhu nati Stoliarenko aser Sofiia Lavrova na 21-18, 21-15 agi koka parnok asaya ayong ayonga kokogo.

Parnoki asaya kabo kokogo, saka taruba asaya akoktsü atema parnok asoshi melarabo masütsü.

India team taruba asaya defending champions China tetsür badminton team den asayatsü. Aser parnok quarterfinals-i aitsü asoshi iba asaya akoktsü nüngdaker.

### Result:

India-i 4-1 agi Ukraine akok (Unnati Hooda bt Polina Buhrova 21-19, 22-20; Tanvi Sharma bt Yevheniia Kantemyr 21-12, 17-21, 21-10; Devika Sihag bt Mariia Stoliarenko 23-21, 21-13; Kavipriya Selvam/Simran Singhi lost to Buhrova/Kantemyr 11-21, 17-21; Tanisha Crasto/Sindhu bt Sofiia Lavrova/Stoliarenko 21-18, 21-15).

## Sawe-i ghonda ana majungdang London marathon asemzuka otsü tasen yanglu



**Rongchii/April 26, 2026 (Agencies):** Sabastian Sawe-i London Marathon nung otsü tasen ka yanglua pa marathon ka ghonda ana majung dang asemzükba mezüngbuba asayar kümogo.

Arishi küm 30 tain Kenya nung asemer yagi ghonda 1, minute 59 ser second 30 nung alizüng tongtet, koba asür Kelvin Kiptum-i 2023 küm 2:00:35 nung alizüng tongteta otsü tasen yanglur aliba minute ka dak tema agi tajemba liasü.

Eliud Kipchoge ya 2019 küm marathon ka ghonda ana majung

dang asemzükba mezüngbuba tebur asayar aküm, saka iba record ya magi kechiyong asemtemba ya controlled conditions nung asema liasü.

Deobarnü asemtepba mapang Sawe-i 1:00:29 nung lenmang tesadangbo asem liasü aser pai tanabuba shilem ya takaraba asem Kipchoge-i yanglur aliba record ajateta liasü.

Tatembangbuba km 10 asemtsü lia Sawe-i asendenshir takaraba asem tenzük aser Yomif Kejelcha-i dang pa den meneptepa asema liasü.

Kejelcha-ia alizüng ya 1:59:41 nung tongteta pa ya race conditions nung ghonda ana majung tsüngda alizüng tonga asema tanabuba asayar aküm.

Half marathon nung world record bena alisang Jacob Kiplimo-ia Kiptum-i taoba mapang record yanglur aliba dang nungi takaraba asema alizüng 2:00:28 nung tongtetogo.

Asaya tembangbuba sülen BBC TV den jembiba mapang

Sawe-i, "Ni kanga pelar. Kü atema iba anogo ya teti bilemtettsüba anogo ka lir.

"Onoki asemtepba kanga junga tenzük. Asaya tatentsü lia ni tashi taitba aküm. Alizüng atongba sülen ni mapang angu aser kanga pela liasü," ta paisa shisem.

Tetsür asemtepba ya Ethiopia tsür Tigst Assefa-i alizüng 2:15:41 nung tongteta la indang title defend süogo. La sülen tanabuba aser tasembuba nung Kenya tsür Hellen Obiri aser Joyciline Jepkosgei na liasü.

Kasa mapang nung elite men's wheelchair race nung Swiss nung Marcel Hug-i London Marathon tibuba kokogo. Pai küm pongububa atonga iba asemtepba koka Great Britain nung David Weir-i iba asemtepba tiben koker aliba de kasa kümogo.

Maneni Catherine Debrunner-i elite women's wheelchair title benogo. Lai America tsür Tatyana McFadden ajateta liasü.

## Brazil centre-back Eder Militao World Cup masayatetsü

**Rongchii/April 26, 2026 (Agencies):** Nüngtugu Brazil aser Real Madrid centre-back Eder Militao yiruba sülen taruba FIFA World Cup masayatetsü. Osangbener Miguel Ángel Díaz-i ashiba agi, Militao ya imlaba dang nungi tamajungba yirur lir.

Deportivo Alavés goal 2-1 agi akokba asaya nung tetsüng tabelen yirushiba sülen Militao temang tendang aser pa kanga mejungi yirur aliba ngutetogo.

Osang ajanga ashiba agi, pa surgery agitsüsa akümstsü. Ibayongji Militao taküm lemluwa international asayamung nung shilem magitetsü aser alima nung asayamung tulutiba nung Brazil tenüng nungi masayatetsü. Pa iba asayamung nung Brazil defence nung tongtibang asayar ka asütsü imla liasü.

COPE nungi osangbener yagi iba osang ya social media ajanga lemsatop. Mezüngbo pa kanga mejungibo meyiru ta club-i ashi, saka Militao ya imlaba dang nungi tamajungba yirur lir.

"Eder Militao tetsüng tabelen nung hamstring yiruba surgery agitsü. Brazil nung asayar ya

December ita Celta Vigo den asayaba mapang yiruba tanaben yirushio," ta Diaz-i zülutsü.

Militao ya ita pezü tashi yiruba ajanga masayati lir tawa-ang asaya tenzük, aser pa Bayern Munich den Champions League quarter-final tanabuba leg nung asaya liasü.

Militao tanaben meyirudaktsü atema Real Madrid puri pa indang workload achaayanga aruogo, saka pa tajungba kümer ama bilemba mapang pa tanaben yirushio. Militao ya 2026-27 season tetenzük nungibo asayatsü club timla lir.

Militao taruba anogo ishika tsüngda surgery agitsü imlar, aser iba sülen pa mapang talangka rehab inyakim sülen anidaktsü.

June ita FIFA World Cup nung mezüngbuba asaya atema par teammate tem renemba mapang pabo surgery agir alitsü aser Real Madrid pur taruba pre-season asaya tenzükba mapangang meyipa arutsü imlar.

Brazil, coach Carlo Ancelotti atema iba asayamung asoshi defence nung asayartem asadangshitsüsa akümstsü.

## Swiatek Madrid Open nung masayatetsüsa kümogo

**Rongchii/April 26, 2026 (Agencies):** Iga Swiatek temang mejungi akümba ajanga Honibarnü Madrid Open tasembuba round tembanga masayati liasü. Kasa mapang nung reigning champion Aryna Sabalenka-ibo asaya 14buba atonga kokogo.

Honibarnü America tsür 31st seed Ann Li den asayaba mapang Swiatek-i mezüngbuba set bo makok saka lai tanabuba set koker decider asayadang 0-3 agi tamakok ngua aliba mapang lai ojang dang asayatsü telemtetba agi. Grand Slam trok koker alila yagi doctor jaok aser la temang tendanga liasü.

Lai Li indang serve break asütsü merang saka fourth seed asayar yagi la joko ojang dang asayatetsü ta imdangi arua asaya nungi anentsü telemtetba agi.

Asaya tembangba sülen lai ashiba agi, la taoba anogo ana tashi tepok nung timtem liasü aser temang mejungaka asaya akoktsü imla liasü.

"Asayartem wara ka agi kongshir lir ta ni angashi. Ni anogo ka ana tsüngda tajungba

akümstsü, saka ni tanü tashi maliasü aser kecha mongui aküm aser iba dang nungi yashi tamajungba liasü," ta Swiatek-i ashi.

Madrid nung la tang agi pongubenbuba asayar aser taküm takaraba tsükogo.

"Asayamung metenzük tsüngda court nung ni kanga junga asaya liasü, anungji ni masayatetsüsa akümba ya tejashitsüka lir, kechiyong ni kanga junga asaya liasü aser tejakdangi renloka oya liasü. Kü atemabo asayamung ya tangang tenzük aser ni tanü asaya tembanga masayatet anungji tezü adanger," ta lai ashi.

Kasa mapang nung Sabalenka bo round of 16 tongtetogo. Lai Romania tsür Jaqueline Cristian 6-1, 6-4 agi akok. La taruba round nung Naomi Osaka mesüra Anhelina Kalinina na rongnung ka den asayatsü.

Kasa asayamung nung Iva Jovic-i 3-6, 6-3, 6-2 agi Canada tsür Leylah Fernandez makok, shiba Round of 16 nung Li den asayatsü.

## BILEMDANGANG

"Na shitak akümstsü atema tangar kar tai akümstsü nüngdak mali."